



STINAPA TA INFORMA

Sue Ellen Felix,
un ensiklopedia di Boneiru riba pia

Maske el a nase na Pennsylvania USA, e dama aki por siña bo hopi di Boneiru. P'esei e tabata e persona ideal pa sertifiká mas ku 250 hende komo "tourguide" kaba, fuera di kasi tur taksista. E ta yena su dianan ku trabou pa su negoshi di bús i transporte. Pero tòg e ta sobra tempu pa organisá aktividat pa su misa, manera toka òrgel i prepará tur músika. Na su manera plasentero e ta splika kon 40 aña pasá el a topa su kasá Amado durante un bishita na Boneiru. E tabata yùfrou di skol i a bin traha akinan den zomer pa duna su amiganan di Trans World Radio un chèns di relahá ku nan famia. Amado i Sue a keda bishitá otro pa 2,5 aña promé ku nan a kasa. Na 1973 Achie Felix a fayesé i Amado a tuma negoshi di su tata over pa perkurá pa su rumannan i mama manera ta kustumber den kultura Libanes. Achie su búsnan tabata embolbí kaba dia sr. LD Gerharts a logra trese e promé barku krusero pa Boneiru. Su flota di bús tabata kore tour ku nan i Sue tabata bai pa siña mas di su isla nobo. No a dura hopi ku LD a pidié pa bira guia turístiko. E tabata sa basta kaba pasobra na Merka el a bai tur biblioteka i libreria pa haña sa mas. Ora bo puntra Sue, kon e ta kompará naturalesa di Boneiru ku esun di Pennsylvania, e ta pensa i kontesta: "Mi ta un hende ku ta bisa: T'aki mi ta, pues mi no ta pensa kiko mi ta sinti falta di dje. Pero mi a realisá si ku Boneiru no tabata un Paraiso Tropikal di den propagandan. Tòg e tin su kalidatnan úniko. Si bo ke gosa di un paisahe plat bo ta bai sùit, òf bai nort pa bo haña serunan fenomenal." Sue ta spera ku e hendenan ku ta bin nobo na Boneiru lo sa di apresia esei, i no mir'é solamente komo un lugá pa traha plaka. "P'esei mi ta siña mi studiantenan ku nos ta un isla di naturalesa speshal, i nos no tin hopi mas fuera di esei. Si esei bai pèrdí e no ta bin bèk! Nan mester splika e turistanan esei tambe." Tambe e ta spera ku porfin lo yega asina leu ku ta investigá efekto riba naturalesa promé ku duna kualkier permiso di konstrukshon pa no dañá por ehèmpel nos kuebanan òf e fantástiko Kibrahacha. "Lo ta bon pa kuminsá balansá e kantidat di hende kontra e loke ku nan ta kontribuí na nos isla, i eduká nan riba nos naturalesa. Tin biaha ta simplemente nan no sa." Por último e ke pidi pa kuminsá trata e awa sushi di kas, hotel i negoshi. Pasobra aunke nos awanan aida ta mas limpi i kla ku hopi otro kaminda, pero el a mir'é bai atras. Tin kos sushi ta drif den dje. Nos mester stòp AWOR di laga sushi bai laman.

Skirbí pa Marcel Nahr

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru